

آدم - الحلقة 1

كان ياما كان و مايجلي الكلام

إلا بذكر النبي محمد عليه الصلاة و السلام

وأولادي اللي بيحبوا سيدنا محمد أكثر واحد في الدنيا كلها ..

لأنه بيعلمهم كل الخير و بيعرفهم إزاي يكونوا في أحسن مكان ... جنة ربنا

هيقولوا بأحلي صوت :

اللهم صل علي سيدنا مُحَمَّد

في بدايه الكون مكنش في غير ربنا و بس علشان هو الأول اللي مفيش قبله أي حد

و بدأ ربنا في خلق الأرض في **يومين** و حط فيها الجبال علشان تمسكها

وفي **4 ايام** حط كل الأرزاق و الأكل اللي يكفوا الناس لحد يوم القيامة

و السما كانت دخان و ربنا بناهم **سبع سماوات في يومين**

و حط في كل سما الحاجه اللي خاصه بيها

فمثلا السما بتاعتنا اللي إحنا بنشوفها فوقنا فيها الشمس و القمر و بقيت

السماوات هنعرف فيها إيه بعدين

و بعدين ربنا خلق **الملائكة** من **نور** و هي مخلوقه علشان تسبح ربنا و تعمل كل اللي

ربنا بيأمرها بيه من غير ما تعصيه

و خلق ربنا **الجن** من **نار** و كان منهم الطيب و الوحش الشرير

و استوى ربنا على **العرش** و خلق سيدنا **آدم** علشان يسكن الأرض ويعبد ربنا

و ربنا قال للملائكة أنه هيخلق **آدم** فخافت **الملائكة** انه يكون ربنا زعلان منهم

فعلشان كده بيخلق **آدم**

و قالوا لربنا يا رب هتخلق ناس ييوظوا الارض و يقتلوا بعضهم و إحنا مخلوقين

علشان نعبدك ونسبح بحمدك

و طبعا **الملايكه** قالوا كده علشان شافوا اللي بيعملوا **الجن** و قالوا ان أكيد **آدم**

وأولاده هيبوظوا الارض زي **الجن** بالضبط

بس ربنا قالهم انا عارف اكثر من اللي انتوا تعرفوه و عارف انا بعمل ايه

و الناس اللي انا بخلقهم دول هيكون في منهم رسل و ناس كويسين بيعبدوني

و هيكون منهم شهداء و بدأ ربنا سبحانه و تعالى يخلق **آدم** من التراب

فأخذ ربنا قبضة رمل من كل الارض و علشان كده الناس مختلفين منهم الأبيض و

الأسود و منهم الخبيث و الطيب

ربنا أمر سيدنا **جبريل** إنه ينزل الأرض و يجيب شويه من ترابها

فلما نزل سيدنا **جبريل**..الأرض قالت له أعوذ بالله منك.. لأ مش هتاخذ مني حاجه

فطلع قال لربنا و قاله هي استعادت بيك يا رب و معرفتش اخذ منها حاجه

فبعث ربنا سيدنا **ميكائيل** و بردو الأرض قالت له نفس الكلام

فراح بعث ربنا **ملك الموت** و بردو قالت له نفس الكلام

بس هو راح قالها وأنا أعوذ بالله منك إني أرجع من غير ما أنفذ أمر ربنا وأخذ ملك

الموت من تراب الأرض كلها و من كل حته فيها شوية تراب

فربنا قال لملك الموت ليه مرحتش الأرض لما إستعادت بي منك

فقال يارب أنا شفت إن تنفيذ أمرك أهم من إني أرحمها

فرينا قاله علشان كده أنا خلتيك **ملك الموت**

و بعدين ربنا سبحانه وتعالى عجن التراب بالميه فبقى طين

و بعدين لما الطين نشف بقى عامل زي الفخار

و ربنا شكل الطين ده بشكل جسم سيدنا **آدم** و ربنا خلى جسمه زي أجسامنا بس

أكبر بكتير يعني طول سيدنا آدم زي **١٠ أدوار كده فوق بعض**

و ربنا سابوا في الجنه مده بس ربنا مقلناش هي قد ايه وكان زي التمثال مش بيتحرك

و نزلت **الايه 1 في سورة الإنسان** بتتكلم عن الموضوع ده وبتقول:

"هَلْ أَتَى عَلَى الْإِنْسَانِ حِينٌ مِّنَ الدَّهْرِ لَمْ يَكُنْ شَيْئًا مَّذْكُورًا"

و بكره إن شاء الله هنعرف ايه اللي حصل لسيدنا **آدم** بس دلوقتي جه معاد النوم

تصبحوا على خير يا حلوين

وصل اللهم وسلم على محمد

آدم - الحلقة 2

كان ياما كان و مايجلي الكلام

إلا بذكر النبي محمد عليه الصلاة و السلام

وأولادي اللي بيحبوا سيدنا محمد أكثر واحد في الدنيا كلها ..

لأنه بيعلمهم كل الخير و بيعرفهم إزاي يكونوا في أحسن مكان ... جنة ربنا

هيقولوا بأحلي صوت :

اللهم صل علي سيدنا مُحَمَّد

بعد ما خلق ربنا **آدم** وسابه في الجنة وهو تمثال بدأ **إبليس** يلف حواليه ويدخل من

ودانه ويخرج من عينيه وعرف إن آدم فاضي من جوه

فقال أنا كده هقدر أدخل وأوسوس له وأخليه ميسمعش كلام ربنا ويوم القيامة هقول

أنا مليش دعوة بيه

وربنا نزل كلام **إبليس** ده في سورة إبراهيم آية ٢٢

وربنا خلق **آدم** يوم الجمعة

والرسول **صل الله عليه وسلّم** يقول إن ربنا خلق الأرض يوم السبت وخلق فيها
الجبال يوم الأحد وخلق الشجر يوم الإثنين وخلق المكروه يوم الثلاثاء وخلق النور يوم
الأربعاء وخلق الدواب يوم الخميس وخلق آدم بعد العصر يوم الجمعة

والرسول قال إنه كان طول سيدنا **آدم** ٦٠ ذراع

والرسول قال إن ربنا خلق سيدنا **آدم** يسلم على **الملائكة** وقال لهم **السلام عليكم**
فردوا وقالوا **وعليك السلام ورحمة الله**

والرسول قال إن الناس هي فضل طولها يقصر لغاية يوم القيامة

وبعد ما خلق ربنا **آدم** ونفخ فيه الروح

عطس **آدم** وبدأ يتحرك جسمه وبقي إنسان يسمع ويشوف ويتنفس

وفتح **آدم** عينيه وشاف **الملائكة** كلهم ساجدين له سجود تحية وتعظيم مش سجود

عبادة

بس شاف واحد بس هو اللي واقف من بعيد يتفرج ومرضاش يسجد زي **الملائكة**

وهو **إبليس** اللعين

وربنا حكى لنا الكلام ده في القرآن في كذا سورة ومنها سورة **الأعراف** من

آية ١٢ إلى آية ١٦

وكمان في سورة **ص الآية ٧٥ و ٧٦**

وبعد لما رفض إبليس السجود **لآدم** طرده ربنا من الجنة

والرسول يقول إنه لما بتيجي سجدة في القرآن ونسجد **الشيطان** بيقعد يعيط ويقول

يا ويلي ربنا أمر **آدم** بالسجود فسجد وهيدخل الجنة وأنا ربنا أمرني بالسجود

فرفضت وهدخل النار

وبعد لما ربنا طرد **إبليس** من الجنة ولعنه

طلب **إبليس** من ربنا طلب وهو إنه يعطي له فرصه لغاية يوم القيامة علشان يقعد

يوسوس للناس بالحاجات الوحشة علشان كل اللي يسمع كلامه يدخل معاه النار

وربنا قال لنا الكلام ده في القرآن في **سورة الأعراف آية ١٥٤**

بس ربنا حمانا من **إبليس** وخططه وقال لنا حتى لو عملتوا حاجة غلط قولوا أستغفر

الله وأنا أغفر لكم كل الأخطاء

علشان كده الإستغفار والأذكار أكثر حاجة بتخلي الشيطان يتغاض لأن كل تبعه

بيروح على الفاضي

وعلشان كده ربنا قال لنا على الشيطان إنه عدو لنا ولازم ناخد بالناس ومنعملش

حاجات غلط

وبعد كده ربنا علم **آدم** أسماء كل حاجة وأسماء كل الكائنات

وقال ربنا **للملائكة** يالا قولوا لي أسماء الحاجات دي كلها مش أنتم فاكرين إنكم

عارفين كل حاجة

فقالوا يا رب سبحانك إحنا منعرفش حاجة غير اللي إنت علمتها لنا

وقال ربنا قول لهم يا **آدم** أسماء الحاجات دي كلها

فلما قالها **آدم** كلها صح ربنا قال **للملائكة** شفتم مش قلت لكم إني أعلم ما لا

تعلمون يعني أعرف اللي إنتم متعرفهوش

وبعد لما حصل كل ده عرفت **الملائكة** ليه ربنا إختار آدم إنه يكون خليفة ربنا في الأرض

مين الشاطر اللي هيقول؟؟

١- ربنا خلق آدم بإييده

٢- ونفخ فيه من روحه

٣- أمر الملائكة بالسجود له

٤- علمه أسماء كل حاجة

و بكره إن شاء الله هنكمل قصة سيدنا **آدم** وإزاي ربنا خلق ستنا حواء بس دلوقتي

جه معاد النوم

تصبحوا على خير يا حلوين

وصل اللهم وسلم على محمد

﴿ ﴿ آدم - الحلقة 3 ﴾ ﴾

كان ياما كان و مايجلي الكلام

إلا بذكر النبي محمد عليه الصلاة و السلام

وأولادي اللي بيحبوا سيدنا محمد أكثر واحد في الدنيا كلها ..

لأنه بيعلمهم كل الخير و بيعرفهم إزاي يكونوا في أحسن مكان ... جنة ربنا

هيقولوا بأحلي صوت :

اللهم صل علي سيدنا مُحَمَّد

بعد ما ربنا خلق سيدنا **آدم** وسكن في **الجنة**

كان يفضل يمشي فيها لوحده وهو زعلان

لأنه وحيد مفيش حد بيتكلم معاه ولا يقعد معاه

لكن ربنا خلق ستنا **حواء** من **ضلع سيدنا آدم**

علشان تكون جزء منه وميقدرش يستغنى عنها ولا هي تستغنى عنه

وكانت من ضلعه الشمال علشان تكون قريبه من قلبه

وسماها ربنا **حواء** لأنها خُلقت من **حي** وهو **آدم عليه السلام**

وربنا أمرهم إنهم يسكنوا الجنة ويأكلوا كل حاجة يحبوها بشرط إنهم يبعدوا عن شجرة

واحدة بس ومايكلوش منها ولا يقربوا منها

وربنا كمان حذرهم من عدو ليهم اسمه **إبليس**

لكن **إبليس** كان بيراقبهم لأن آدم كان سبب غضب ربنا عليه لأنه رفض إنه يسجد

لآدم مع **الملائكة**

وسمع إن ربنا قاهم ميكلوش من الشجرة فقعد يوسوس ليهم ويقول لهم صدقوني أنا

عايز مصلحتكم اسمعوا كلامي وكُلُوا من الشجرة دي

وحلف بالله إن كلامه كله صح وفي مصلحتهم وقال لهم لو أكلتم من الشجرة دي

هتكونوا ملكين خالدين

ونسى **آدم** إن ربنا حذره من الأكل من الشجرة دي

ونسى كمان إن ربنا قال له إن **إبليس** عدو له وعايز يضره

وأكل آدم من الشجرة هو وحواء

وأول لما أكلوا من الشجرة ملابس الجنة وقعت من عليهم وبقوا ياخذوا ورق الشجر

علشان يغطوا بيه نفسهم

وربنا زعل منهم وقالمهم أنا مش قلت لكم متكلوش من الشجرة دي ليه مسمعتوش

الكلام وقلت لكم إن الشيطان عدوكم

فقالوا يا رب إحنا غلطنا وخلص مش هنعمل كده تاني يارب ساعدنا وارحمنا

وطبعا ربنا بيقبل الدعاء والتوبة طالما الواحد ندم وعرف غلظه وقال أنا مش هعمل

كده تاني

بس ربنا أمرهم بالنزول من الجنة إلى الأرض

وربنا قال لهم إنه جهز لهم الأرض علشان يعرفوا يعيشوا فيها لغاية يوم القيامة حتى

إن ربنا نزل لهم فواكه من الجنة بس الفرق إن الفواكه في الأرض بتبوظ وتعفن بسرعة

لكن في الجنة مش بتتغير

وربنا أمر إبليس كمان إنه ينزل الأرض مع آدم وحواء

وربنا قال لهم إنكم أعداء لبعض واللي هيسمع كلام الشيطان هيدخل النار معاه

وربنا قال لهم هتعيشوا في الأرض وهموتوا فيها ويوم القيامة هتطلعوا منها إما للجنة
أو للنار

وخرجوا من الجنة يوم الجمعة وإحنا قلنا قبل كده إن ربنا خلق آدم يوم الجمعة
وكمان دخله الجنة يوم الجمعة وفي الآخر خرج من الجنة يوم الجمعة

وكمان يوم الجمعة هيكون كمان يوم القيامة

ولازم كلنا نستفيد من قصة سيدنا آدم ونعرف إن الشيطان عدونا وهو اللي أخرج
أبونا آدم من الجنة

ولازم نعرف كمان إننا لازم ميكنش عندنا عند زي الشيطان علشان عنده هو اللي
خلى ربنا يغضب عليه

ولازم كمان نعرف إن الخطأ والنسيان حاجة عادية لكن المهم إننا نعترف بخطأنا
ومنصممش على الخطأ ونتوب لربنا بسرعة

ولازم كمان نعرف إن الشيطان عدونا وهيفضل يوسوس لنا على طول علشان هو
عايزنا ندخل النار زيه بالضبط

وكمان لازم نعرف إن الجنة هي بيتنا الأصلي اللي هنرجع ليها تاني يوم القيامة وإن

الفترة اللي قعد فيها سيدنا آدم وحواء في الجنة كانت تدريب لهم إنهم لازم يسمعوا

كلام ربنا وينفذوه

وربنا خلى شهر رمضان فترة تدريب لينا لأننا بنسيب فيه الأكل والشرب وهي

حاجات حلال علشان نعرف نتحكم فيها بأنفسنا

و بكره إن شاء الله هنكمل قصة سيدنا **آدم** وأولاده **قابيل وهابيل** علشان دلوقتي

جه معاد النوم

تصبحوا على خير يا حلوين

وصل اللهم وسلم على محمد